

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Sports & Youth Services Minister Pu Lalngthinglova Hmar chuan, sorkar sikul te chu mipi dinhmu hrang hrang huapzo a nih thu a sawi.
2. Nimin December ni 2 kha National Pollution Control Day niin, hemi denchhen hian Mizoram Pollution Control Board hnuai Environment Education Programme (EEP) chuan Online competition hrang hrang a buatsaih.
3. Union Health Minister J P Nadda chuan ramchhungah TB natna avanga thih zat an tlahniam a ti
4. Sri Lanka-a Cyclone Ditwah tleh avanga thi zat chu mi 465 an tling tawh.

<><><>

**SPORTS MINISTER**

Sports & Youth Services Minister Pu Lalngthinglova Hmar chuan, sorkar sikul te chu mipui dinhmun hrang hrang huapzo a nih thu a sawi.

Nimin khan Pu Lalngthinglova Hmar hian a bial - Aizawl West II Assembly Constituency chhunga zirna in pathum - MICE, Tuikual North; Gairigaon Primary School, Dinthar leh Govt. Middle School - II, Dinthar - te hnenah tanpuina sumfai cheng nuai thum a hlan a, minister chuan, sawrkar sikulte chu mipui dinhmun hrang hrang huapzo an ni tih sawiin, dinhmun harsa zawka awmte tan pawh kal theihna a ni thin a ti a. Chuvangin hmalam pana an kal zelna turah engtingge zirlai tam zawk an neih theih ang tih ngaihtuah a ngai a, hmunhma leh bungruaah pawh hma an sawn zelna tura tan lak a ngai a ni, a ti a.

Minister chuan, "Sawrkar sikulte chu a zirtirtuteah chuan trained teacher leh qualified teacher zawk awmna a ni a, zirlai tam zawk an luh theihna tura hma lak a pawimawh a ni a ti a. Tunhnaiah pawh an bial chhunga sikul thenkhatte chuan an zirtirtute inpekna avangin state dangah an zirlaite an zinchhuahpui thei a. Sikul danga an tih theih loh kha sawrkar sikul in an ti thei a, an zirtirtute inpekna vang liau liau a ni." tiin a sawi bawk.

Pu Lalngthinglova Hmar hian November ni 4 khan a bial chhunga sawrkar school parukte hnenah study tour neihna tur Rs. 3,49,940/- a lo pe tawh bawk a, November leh December thla chhungin school hrang hrang hrang puihna'n Rs. 6,49,940/- a hlan tawh a ni.

MICE leh Dinthar Govt. M/S-II te hi study tour an neih tura zirtirtute thawhkhawm doletna niin, Gairigaon P/S hi school thuthleng leh dawhkan siamthatna tur a ni.

DIPR

<><><>

**MUHCS**

Mizoram sorkar chuan Mizoram Universal Healthcare Scheme (MUHCS) hmanngu damlote enkawlna senso atan MUHCS kalpuitu damdawi-inte hnenah damlo an enkawlna bill cheng nuai 8,405 a pe tawh.

Mizoram State Healthcare Society (MSHCS) atanga Akashvani News Aizawl thudawn danin, kumin April thlaa MUHCS kalpui a nih atanga thla liamta November 28 thleng khan MUHCS kalpuitu damdawi-inte hnenah damlo enkawlna senso an pe tawh a, bill an pek tawh zawng zawng hi a vaiin cheng nuai 8,405 niin, heng hi MUHCS kalpuina damdawi-in hrang hranga damlo 54,261-te enkawlna bill a ni. Waviin hian MSHCS hian damdawi-inte hnenah damlo enkawlna bill pek leh an tum a, an buaipui mek a ni.

Mizoram chhungah MUHCS kalpuitu empanelled private hospital 13 leh empanelled private day care centre pathum a awm a, Mizoram pawnah empanelled hospital 25 leh deemed empanelled hospital 13 a awm mek bakah, Mizoram chhunga sorkar damdawi-in zawng zawngah MUHCS hi hman a ni bawk.

Kumin July thla khan damlo 10,652 bill atan MUHCS kalpuitu damdawi-inte hnenah cheng nuai 1,496 pek niin a tam ber thla a ni a; April thla khan damlo bill 1,548 atan cheng nuai 109 pek niin a tlem bertum a ni.

*(Voice Cast)*

*MUHCS-ah hian kum 2025-26 atan sorkar hnathawk chhungkaw 36,324, civil pensioner chhungkaw 8,733 leh AB PM-JAY golden card nei chhungkaw 2,20,463 leh a hranpaa pawisa chawia inziak lut (contributory) chhungkaw 20,136 an awm a; CSS leh grant-in-aid (GIA) hnuaia thawk inziak lut zat erawh hriat theih a la ni lo.*

(CORR Johny)

<><><>

**NATIONAL NUTRITION MONTH**

8th Rashtriya Poshan Maah (National Nutrition Month) 2025-a Serchhip District in ‘Best Performing District’ a lawmman pahnihna a dawn lawmna chu, nimin khan Sub-Hqrs. YMA Serchhip Hall-ah neih a ni.

District Bawrsap Pu Paul L. Khuma chuan, intihsiakna hrang hrangah lawmman lak a harsat thin thu sawiin, Mizoram puma District hrang hrang ten Rashtriya Poshan Maah 2025 puala inelna an neihah Serchhip District in lawmman hlu tak a dawng chu lawmawm a tih thu leh lawmman an lak hian he hmalakna a thawktute hnathawh a langchiang hle tih a sawi a. Serchhip District tana theihtawp chhuah zel tur leh nu leh naupang ten hmalam hun eng zawk an neih theihna tura theihtawp chhuah zel a, an kawng atana lo eng zual zel turin a chah a ni. Serchhip Bawrsap chuan he huna kalkhawmte chu nu te pawimawhna hre reng tura chahin, chumi rual chuan nu te pawhin an pawimawhna an hriat reng a tul thu a sawi bawk a ni.

He hunah hian Women and Child Development Department Joint Director leh Serchhip DPO mawhphurhna la mektu Pi Sailopari chuan kum 2018 atang khan kumtin Rashtriya Poshan Maah hi hman thin a nih thu leh, kumin a Rashtriya Poshan Maah-ah hian District hrang hrang leh ICDS Project ten ngaihtuahna tha tak tak an neih te phochhuah a nih theih nan inelna an buatsaih thu a sawi a, chu inelna-ah chuan Serchhip District in lawmman pahnihna a lak lawmna chu an buatsaih thu a sawi a ni.

Hemi rual hian Beti Bachao, Beti Padhao hnuaia WCD Department-in School an adopt, Govt. High School Serchhip-a zirlaite tan 'Promise Ring' semna neih nghal a ni a. Hemi atan hian zirlaite chuan ruihhlo laka fihlim turte, mipat hmeichhiatna hmankhawloh laka fihlim tur leh an zirlaite tha taka zira thawhchhuah an neih hma loh chuan nupui pasal nei lo tura thu tiamin, zirlaite hnenah hian Bawrsap hian Zungbun a hlan bawk a ni.

C. Lalhminghlua, Serchhip PTC

<><><>

**POLLUTION CONTROL DAY**

Nimin December ni 2 kha National Pollution Control Day niin, hemi denchhen hian Mizoram Pollution Control Board hnuaia Environment Education Programme (EEP) chuan Online competition hrang hrang a buatsaih.

Primary leh Middle School chin tân Online Poster Making Competition buatsaihin thupui atân “Stop Pollution, Save Earth” leh “Pollution: The Silent Killer” hman a ni. Primary Level-ah hian zirlai 107 telin Middle School Level-ah pawh hian zirlai 101 an tel bawk.

High School leh a chunglam tân leh College level tân Online Quiz competition buatsaih a ni bawk a, “Environmental Pollution” tih thupui hmanin naupangin Quiz hi Google Form-ah an chhâng a, result hi December ni 4-ah puan a ni ang a, a titha zual mi 10 hnênah lâwmmman leh e-certificate pêk an ni ang. Hêng bâkah mipuite hnênah awareness atân e-poster siam niin social media platform hrang hrangah theh darh a ni.

National Pollution Control Day hi India ramah December ni 2 hian kum tinin hman thin a ni a, he ni hi Bhopal Gas Tragedy kan tih mai kum 1984 December 2–3 a chhiatna thleng hriat reng nân leh pollution chungchânga awareness neih nânte hman thin a ni.

PR

<><><>

**CIJW SCHOOL COMMANDANT**

Vairengte CIJW School a an hotu Commandant thar Maj. Gen. Kulvir Singh chuan nimin khan Kolasib DC pisa tlawh in, DC leh mi pawimawh dangte nen an inkawm.

Vairengtea Counter Insurgency & Jungle Warfare School (CIJW School) hotu Commandant thar puala inkawmna hun kaihruihu Kolasib DC Pu Robert C. Lalmangaiha chuan, Kolasib District chhunga sorkar department hrang hrang hotute leh CIJW School hotuten thawh hona tha tak neih zel a pawimawh

thu sawiin, sorkar hmalakna kawng hrang hrangah thawh hona tha tak nei chhonzawm zel turin a sawm a, Commandant chu a hnathawhna-ah duhsakna a hlan nghal bawk.

He hunah hian Maj. Gen. Kulvir Singh chuan, CIJW School, Vairengte chu sipai training na hmunpui a nih avangin khawvel hmun hrang hrang atangin sipai training turin an pan thin thu a sawi a, an hnathawhna-ah mipui te tana tangkaina an nei ve thei a nih chuan theihtawp a puih an in huam reng thu sawi in, District Administration nen pawh thawh hona tha tak neih zel chu pawimawh a tih thu a sawi bawk.

Commandant chuan ESM Welfare chungchang te, Sainik Aramghar te leh ZSB office chungchangte pawh a sawi bawk. DC hova inkawm hona-ah hian Kolasiba sorkar department hotu thenkhat te, CIJW School hotute leh Kolasiba chanchinbu mite an tel a ni.

Andrew Vanlalauva, Kolasib PTC

<><><>

## **AKASHVANI-RIMAWI KUTPUI**

Akashvani Aizawl buatsaih Rimawi Kutpui nimina Aizawl Tuikhuahtlanga Akashvani Conference Hall-a hmanah, Akashvani Aizawl Director leh Mizoram Cluster Head Pu DR Lalropuia'n Akashvani Aizawl ah Visual Radio System bun thuai tum a ni, a ti.

Rimawi Kutpui - Winter Wonderland hi kumin Krismas lo thleng tur inpuahchahna puala Akashvani Aizawl-a thawktute rimawi hmanga intihlimna atana buatsaih a ni a, Director Pu DR Lalropuia chuan Visual Radio System bun turin kawng hrang hranga hmalak a ni a ti a, studio ti changtlung zual tur leh camera bakah khawl tam tak ken tel a neih dawn avangin tih changtlun ngai tam tak a awm tih sawiin peih fel thuai tura hmalak mek a nih thu a sawi.

**(BYTE)**

Pu DR Lalropuia chuan hla chu mihring rilru leh ngaihdan thlak theihna kawng pawimawh tak a ni a ti a, tunlai khawvela midang ngaihsakna a tlem tawhna-ah hla chu midangte dinhmun hrethiamtu leh harsatna an tawh changa in awm tleina ber a nih avangin Rimawi Kutpui chu a pawimawh hle a ti a, mi tam zawkin rimawi an hlut leh zual theih nan Radio thawktute tan la turin a sawm a ni.

Rimawi Kutpuiah hian zai leh lam bakah intihlimna hrang hranga hun hman a ni a, Tun dinhmunah Akashvani Aizawlah hian thawktu mi 170 an awm mek a, a ngheta thawk mi 50 leh a nghet lo a thawk mi 120 an awm mek a ni.

(Corr : Isaac)

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

## **TB**

Union Health Minister J P Nadda chuan ramchhungah TB natna avanga thih zat an tlahniam a ti. Nimina TB-Mukt Bharat Abhiyaan chungchanga Paliament Memberte thutkhawm Extended Parliament House Annexe Auditorium, New Delhi-a neihah he thu hi sawiin Pu Nadda chuan kum 2015 ah khan TB avanga thi mipui nuai 1 ah 28 anga chhut anih laiin kum 2024 ah chuan mihring nuai 1 ah TB avanga thi zat hi 21 a ni tawh a ti a. He hunah hian Union Health Minister chuan MP te chu an bial theuhah TB umbo tura hmahruaitu dinhmun luaha theihtawp chhuah turin a ngen a. Mipuite hnenah inhrilhriatna lam uar tur leh TB natna veitute thinhrikna ti bo turin a ngen a ni.

(Newsonair)

<><><>

## **SRI LANKA**

Sri Lanka-a Cyclone Ditwah tleh avanga thi zat chu mi 465 an tling tawh. Mi 366 chin hriatlohin an awm. Cyclone Ditwah hi Sri Lanka ramchhunga district 25 a cheng mi maktaduai 1 leh nuai 55 chuangin an tuar a ni. India chuan Operation Sagar Bandhu hnuaiah Sri Lanka-a cyclone tuarte chhawmdawl hna ngawrh takin a thawk chhonzawm a. IAF helicopter IFC 1875 hmangin Madaram Nuwara ah chhawmdawl na bungrua kg 2000 thlak a ni a. Irunguwatta ah mi 17 hmun him lamah sawnchhuah an ni bawk. Hei bakah hian C-17 sipai thlawhtheihna hmangin Colombo ah damdawi bungrua phurh thlen a ni tawh a. Doctor 70 a hmun an thutchilh nghal a ni.

(Newsonair)

<><><>